

現代生活藝術系列

華嚴經疏論纂要 96

— 離世間品之七

華藏淨宗學會印贈

大方廣佛華嚴經疏論纂要卷第九十六

五臺山清涼國師澄觀疏鈔

太原方山長者李通玄 論

閩鼓山私淑比丘道霈纂要

離世間品第三十八之七

佛子。菩薩摩訶薩有十種魔。何等爲十。所謂蘊魔。生諸取故。煩惱魔。恒雜染故。業魔。能障礙故。心魔。起高慢故。死魔。捨生處故。天魔。自憍縱故。善根魔。恒執取故。三昧魔。久耽味故。善知識魔。起著心故。菩提法智魔。不願捨離故。是爲十。菩薩摩訶薩應作方便速求。

遠離

疏第三有十魔下十門。明離障行。分二。前五門。明離障成行。後五門。明離障加持。前中分三。初二門。明所離障體。次一門。明離障方便。後二門。顯見佛成行。前中初顯魔體。後辨魔因。今初十魔。能障道故。一蘊魔者。身爲道器。體與佛同。豈卽是魔。蘊魔之名。特由取著。下九例爾。皆以下句釋成魔義。是知以心分別。萬法皆魔。何但此十。故舉菩提法智。以勝况劣。不以心分別。一切皆佛。豈捨魔界求佛界耶。然四魔直就體明。十魔多約執取。十表無盡。

故與四不同。若欲攝者。除三同外。皆煩惱攝。法卽所證。智是能證。能所冥合。故名菩提。若不捨於分別菩提之見。卽是魔矣。餘文自顯。

佛子。菩薩摩訶薩。有十種魔業。何等爲十。所謂忘失菩提心。修諸善根。是爲魔業。惡心布施。瞋心持戒。捨惡性人。遠懈怠者。輕慢亂意。譏嫌惡慧。是爲魔業。於甚深法。心生慳悋。有堪化者。而不爲說。若得財利。恭敬供養。雖非法器。而強爲說。是爲魔業。不樂聽聞。諸波羅蜜。假使聞說。而不修行。雖亦修行。多生懈怠。以懈怠故。志意狹劣。不求無上大菩提法。是爲魔業。遠

善知識。近惡知識。樂求二乘。不樂受生。志尚涅槃。離欲寂靜。是爲魔業。於菩薩所起瞋恚心。惡眼視之。求其罪釁。說其過惡。斷彼所有財利供養。是爲魔業。誹謗正法。不樂聽聞。假使得聞。便生毀訾。見人說法。不生尊重。言自說是。餘說悉非。是爲魔業。樂學世論。巧述文詞。開闡二乘。隱覆深法。或以妙義授非其人。遠離菩提。住於邪道。是爲魔業。已得解脫。已安隱者。常樂親近。而供養之。未得解脫。未安隱者。不肯親近。亦不教化。是爲魔業。增長我慢。無有恭敬。於諸衆生。多行惱害。不求正法。真實智慧。其心弊惡。難可開悟。是

爲魔業。是爲十。菩薩摩訶薩。應速遠離。勤求佛業。

〔疏〕二有十魔業者。行此十事。皆能訛善。亦招天魔。故爲其業。十中。一由忘行本。令所修善。感生因果。不至菩提。故是其業。二於蔽度不平等。故於中初二蔽俱行度。後四嫌棄有蔽之人。文影畧耳。夫真道者。不施不慳。不戒不犯。不忍不恚。不進不怠。不定不亂。不智不愚。嫌他不忍。忍度豈成。他皆倣此。又悲化惡。故况惡爲善資。不愛其資。是大迷也。餘八易知。然觀此文。難免魔業。願諸後學。審此省躬。佛子。菩薩摩訶薩。有十種捨離魔業。何等爲十。所謂

近善知識恭敬供養捨離魔業。不自尊舉不自讚歎
捨離魔業。於佛深法信解不謗捨離魔業。未曾忘失
一切智心捨離魔業。勤修妙行恒不放逸捨離魔業。
常求一切菩薩藏法捨離魔業。恒演說法心無疲倦
捨離魔業。歸依十方一切諸佛起救護想捨離魔業。
信受憶念一切諸佛神力加持捨離魔業。與一切菩
薩同種善根平等無二捨離魔業。是爲十。若諸菩薩
安住此法。則能出離一切魔道。

〔疏〕第二捨魔業。卽離障方便。對障修治。故云捨離。
然此十句。敵對反前。但畧而不次耳。一反第五。二

反第二。三反第七。四反第一。五反第四。六反第八。
七反第三。八反第九。救護彼故。九反第十。若得佛
加。弊惡息故。十反第六。同一善根。豈求惡故。然復
欲顯隨其一善。總反前十。或以多善。共反前一。令
不定執。故不次耳。

佛子。菩薩摩訶薩。有十種見佛。何等爲十。所謂於安
住世間。成正覺佛。無著見。願佛出生見。業報佛。深信
見。住持佛。隨順見。涅槃佛。深入見。法界佛。普至見。心
佛。安住見。三昧佛。無量無依見。本性佛。明了見。隨樂
佛。普受見。是爲十。若諸菩薩。安住此法。則常得見無

上如來

〔疏〕第三二門顯見佛成行。由障離故果現行成於中先見佛。後成行。今初卽是果現。此中所見卽前十佛。亦是八地十身。十身與此各小不同。已如前會。然此中明見皆稱彼佛而見。如云無著自屬正覺。非謂菩薩於彼不著。若菩薩於此不著。下九豈當著耶。是知皆就所見明見。亦不得半就所見。半約能見。一無著者。安住世間故。不著涅槃。成正覺故。不著生歿。乘無住道。示成正覺。故名無著。稱此而見。是見正覺。他皆準此。又無邪慧而不離。故云

無著。無正德而不圓。故云正覺。則佛見影畧。此卽
總句。下九皆此別義。二乘願出生。故上文云。佛願
力故無不現。又乘此願能生一切德故。三報卽相
好莊嚴身。業卽萬行之因。而深信爲首。云深信見
故下善財云。一切諸佛從信心起。亦能令見者信
故。四隨順衆生。住持舍利等故。又隨順衆生。以圓
音周徧三世持佛法故。五涅槃卽是化身。化身示
滅。故名涅槃。深入見者。深入涅槃。故能示滅。深入
生處。故示滅非真。鈔深入涅槃者。得無住涅槃。能
建大事。深入生處。故示滅非真。
者。悟生處性。卽性淨涅槃。故知
示滅非真滅也。稱性常在故。六法身充滿於法

界故。法界爲佛體故。七湛然安住真唯識性。是佛
心故。八寂然無依。心言路絕。卽三昧義。觸類皆然。
故三昧無量。九平等性智了本性故。本覺真性。性
本了故。十隨自他意無身不受故。依上十見。則真
見佛。旣知十佛。總別六相圓融。則依十見。無有障
礙。依上十下。六相圓融。總卽一佛。別分爲十。同帶
於佛。異則正覺相好等差。成則攬十共成真佛
之義。壞則十
身各任自位

佛子。菩薩摩訶薩有十種佛業。何等爲十。所謂隨時
開導是佛業。令正修行故。夢中令見是佛業。覺昔善
根故。

疏二有十種佛業。卽是成行。前見佛體。今辨佛因。又行順佛行。故名佛業。佛以利生爲事業故。十中初總餘別。又總別合爲五對。一覺導夢化對。

爲他演說所未聞經是佛業。令生智斷疑故。爲悔纏所纏者。說出離法。是佛業。令離疑心故。

疏二開纏淨戒對。犯戒疑悔。故爲彼纏。令其懺除。故名出離。戒有各種。出離亦多。總相言之。不過二種。一事。二理。事隨輕重。篇聚悔除。理觀性空。是真奉律。若具二者。罪無不離。又如瑜伽九十九有五惡作。卽是悔纏。一謂作是思惟。後定自責。二諸天

呵責三大師同行責。四惡名流布。五歿墮惡趣。亦有五相能除此惡作。謂佛許還淨故。由無知等。我已滅故。當來無犯意。我已生故。已於同梵行悔故。佛說悔除爲善哉。惡作相續以爲蓋故。餘如淨名

第一。及隨好品辨。

鈔又瑜伽九十九下。重釋淨戒。先舉所治。後亦有五相下。舉其

能治。此五亦可對前五。唯三四不次。一由佛許還淨。故不自責。二由滅無知。不懼天所呵。三已生無犯之意。不懼惡名。四同行悔。不懼同行之責。五佛許悔除。故不懼惡道。而其實義。此五通能治於前五

若有衆生起慳悋心。乃至惡慧心。二乘心。損害心。疑惑心。散動心。憍慢心。爲現如來衆相莊嚴身。是佛業。

生長過去善根故。於正法難遇時。廣爲說法。令其聞已。得陀羅尼智。神通智。普能利益無量衆生。是佛業勝解清淨故。

〔疏〕三現相說法對。於現相中。由如來相從六度生。故除六蔽。見此殊勝。不希二乘。覩慈善根。決知尊勝。任心佛境。自失威光。故無害等。

若有魔事起。能以方便現。虛空界等聲。說不損惱他法。以爲對治。令其開悟。衆魔聞已。威光歇滅。是佛業。志樂殊勝。威德大故。其心無間。常自守護。不令證入二乘正位。若有衆生根性未熟。終不爲說解脫境界。

是佛業。本願所作故。

疏四降魔護小對。

生死結漏一切皆離。修菩薩行相續不斷。以大悲心
攝取衆生。令其起行。究竟解脫。是佛業。不斷修行菩
薩行故。菩薩摩訶薩了達自身。及以衆生。本來寂滅。
不驚不怖。而勤修福智。無有馱足。雖知一切法無有
造作。而亦不捨諸法自相。雖於諸境界永離貪欲。而
常樂瞻奉諸佛色身。雖知不由他悟入於法。而種種
方便求一切智。雖知諸國土皆如虛空。而常樂莊嚴
一切佛刹。雖恒觀察無人無我。而教化衆生無有疲

狀雖於法界本來不動。而以神通智力現衆變化。雖已成就一切智智。而修菩薩行無有休息。雖知諸法不可言說。而轉淨法輪令衆心喜。雖能示現諸佛神力。而不狀捨菩薩之身。雖現入於大般涅槃。而一切處示現受生。能作如是權實雙行法。是佛業。是爲十。若諸菩薩安住其中。則得不由他教。無上無師廣大業。

〔疏〕五悲攝雙行對。雙行中有十二句。初一總明無作四諦。不驚怖者。妄惑本無。今有。故應驚。妄苦逼害身心。故應怖。今皆了本寂。卽同滅理。故不驚怖。

雖了本寂而修福智。爲能治道。餘十一句別中。初
一約苦。次一約集。次八約道。後一約滅。文並可知。
佛子。菩薩摩訶薩。有十種慢業。何等爲十。所謂於師
僧父母。沙門婆羅門。住於正道。向正道者。尊重福田
所。而不恭敬。是慢業。或有法師。獲最勝法。乘於大乘。
知出要道。得陀羅尼。演說契經廣大之法。無有休息。
而於其所起高慢心。及於所說法。不生恭敬。是慢業。
於衆會中。聞說妙法。不肯歎美。令人信受。是慢業。好
起過慢。自高陵物。不見已失。不知自短。是慢業。好起
過過慢。見有德人。應讚不讚。見他讚歎。不生歡喜。是

慢業見有法師爲人說法。知是法是律。是真實。是佛語。爲嫌其人。亦嫌其法。自起誹謗。亦令他謗。是慢業。自求高座。自稱法師。應受供給。不應執事。見有耆舊久修行人。不起逢迎。不肯承事。是慢業。見有德人。輿感不喜。言辭麤獷。伺其過失。是慢業。見有聰慧知法之人。不肯親近。恭敬供養。不肯諮問。何等爲善。何等不善。何等應作。何等不應作。作何等業。於長夜中。而得種種利益安樂。愚癡頑很。我慢所吞。終不能見出要之道。是慢業。復有衆生。慢心所覆。諸佛出世。不能親近。恭敬供養。新善不起。舊善消滅。不應說而說。不

應諍而諍。未來必墮險難深坑。於百千劫尚不值佛。何況聞法。但以曾發菩提心故。終自醒悟。是慢業。是爲十

〔疏〕第二有十慢。下五門。明離障加持。行中二。初二門。內成離障行。後三門。外得加持行。前中初門。舉障。後門顯治。今初慢者。恃已於他。高舉爲性。能障不慢。生苦爲業。然經論中。說多差別。且明七慢。俱舍十九云。一慢。二過慢。三慢過慢。四我慢。五增上慢。六卑慢。七邪慢。今文開十。四五與九。具有其名。餘七。但有其義。前三卽慢。但約有高心故。故彼論

中云。一慢者。謂於他劣。謂已勝於他等。謂已等。雖能稱境。以心高舉。說名爲慢。初一輕人。次二慢法。四中自高陵物。是於他等。謂已勝。卽當過慢。過前慢故。五卽慢過慢。今言過過者。過前慢故。有德應讚。卽於他勝。見讚不喜。是謂已勝。應合讚我故。六卽邪慢。謂於無德。謂已有德。故名邪慢。成就惡行。名爲無德。恃惡高舉。名之爲慢。自起誹謗。卽惡行故。七卽卑慢。耆舊有德。卽是彼多分勝。不應執事。卽謂已小劣。何得事他。八亦邪慢。起惡行故。九卽我慢。我慢所吞故。十卽增上慢。新善未起。卽是未

得。不應諍而諍。卽是謂得故。其但以曾發下。準梵本。應迴安於百千劫前深坑之下。彼梵本從消滅下云。不應說而說。言多鬪諍。發起怨嫌。數行此法。應墮大坑。然以曾集菩提心力。得受豪貴自在之力。於百千劫尙不見佛。何況聞法。晉及度世大意。皆同梵本。若但依今釋。當墮深坑。語其慢過。終自醒悟。明非長沒。若約八慢。前三皆是憍慢。亦名傲慢。皆於尊境不肯禮敬。故餘如別說。鈔若約八慢者卽刊定意。

涅槃成實皆有八慢。天台智者引文殊問經釋法華八身。明有八慢。謂一盛壯慢如鵝。二性慢如梟。三富慢如鵬。四自在慢如鷲。五壽命慢如鳥。六聰明慢如鵠。七行慢如鳩。八色慢如鴿。

若諸菩薩離此慢業。則得十種智業。何等爲十。所謂
信解業。報不壞因果。是智業。不捨菩提心。常念諸佛。
是智業。近善知識。恭敬供養。其心尊重。終無厭怠。是
智業。樂法樂義。無有厭足。遠離邪念。勤修正念。是智
業。於一切衆生。離於我慢。於諸菩薩。起如來想。愛重
正法。如惜己身。尊奉如來。如護己命。於修行者。生諸
佛想。是智業。身語意業。無諸不善。讚美賢聖。隨順菩
提。是智業。不壞緣起。離諸邪見。破暗得明。照一切法。
是智業。十種迴向。隨順修行。於諸波羅蜜。起慈母想。
於善巧方便。起慈父想。以深淨心。入菩提舍。是智業。

施戒多聞止觀福慧。如是一切助道之法。常勤積集。無有厭倦。是智業。若有一業爲佛所讚。能破衆魔。煩惱鬪諍。能離一切障蓋纏縛。能教化調伏一切衆生。能隨順智慧。攝取正法。能嚴淨佛刹。能發起通明。皆勤修習。無有懈怠。是智業。是爲十。若諸菩薩安住其中。則得如來一切善巧方便。無上大智業。

〔疏〕二十種智業。顯對治行。謂旣識障惑。不令增長。制情從理。敬重法行。故名智業。文中初結前生後。交通兩段。後何等下。正顯。竝是智之作用。故名爲業。

佛子。菩薩摩訶薩有十種魔所攝持。何等爲十。所謂
懈怠心魔所攝持。志樂狹劣魔所攝持。於少行生足
魔所攝持。受一非餘魔所攝持。不發大願魔所攝持。
樂處寂滅。斷除煩惱魔所攝持。永斷生死魔所攝持。
捨菩薩行。魔所攝持。不化衆生魔所攝持。疑謗正法
魔所攝持。是爲十

〔疏〕第二魔攝持下三門。辨外加持行。分二。此門所
離障。後二門能治行。今初。卽最障加持。由內行足
理外。魔得便。名爲攝持。又行乖理。卽是魔攝。初二
心怠志陘。次二行少解滯。次二捨願趣斷。次二成

小捨大後二捨悲謗法

若諸菩薩能棄捨此魔所攝持。則得十種佛所攝持。何等爲十。所謂初始能發菩提之心。佛所攝持。於生中持菩提心不令忘失。佛所攝持。覺諸魔事悉能遠離。佛所攝持。聞諸波羅蜜如說修行。佛所攝持。知生死苦而不厭惡。佛所攝持。觀甚深法得無量果。佛所攝持。爲諸衆生說二乘法而不證取彼乘。解脫佛所攝持。樂觀無爲法而不住其中。於有爲無爲不生二想。佛所攝持。至無生處而現受生。佛所攝持。雖證得一切智而起菩薩行。不斷菩薩種。佛所攝持。是爲

十若諸菩薩安住其中。則得諸佛無上攝持力。

〔疏〕第二佛所攝下二門。明能治行。由離於邪。自然合正。於中先佛。後法。今初。先結前生後。後何等下。正說文顯可知。

佛子。菩薩摩訶薩有十種法所攝持。何等爲十。所謂知一切行無常。法所攝持。知一切行苦。法所攝持。知一切行無我。法所攝持。知一切法寂滅涅槃。法所攝持。知諸法從緣起。無緣則不起。法所攝持。知不正思惟故。起於無明。無明起故。乃至老死起。不正思惟滅故。無明滅。無明滅故。乃至老死滅。法所攝持。知三解。

脫門出生聲聞乘證無諍法出生獨覺乘。法所攝持。知六波羅蜜四攝法出生大乘。法所攝持。知一切剎。一切法。一切衆生。一切世。是佛智境界。法所攝持。知斷一切念。捨一切取。離前後際。隨順涅槃。法所攝持。是爲十。若諸菩薩安住其中。則得一切諸佛無上法所攝持。

〔疏〕二法攝中。前四卽四法印。次二總別緣生。次二大小。後二智斷。上辨因圓究竟訖。

佛子。菩薩摩訶薩住兜率天。有十種所作業。何等爲十。所謂爲欲界諸天子說厭離法。言一切自在皆是

無常。一切快樂。悉當衰謝。勸彼諸天發菩提心。是爲
第一所作業。

疏第二任兜率下十九門。明果用圓滿行。多約八
相顯果用者。明是普賢大川之果。不就淨土實報
處說。又顯實報不可說故。又顯八相通因果故。長
分爲十。初一門任天。次一門示沒。三一門入胎。四
一門住胎。五三門初生。六二門在家。七二門出家。
八五門成道。九二門轉法輪。十有一門入涅槃。初
之二門。合屬第三。卽是八相。今初欲說下生。先明
在天所作。一化欲天。

爲色界諸天說入出諸禪解脫三昧。若於其中而生
愛著。因愛復起身見邪見無明等者。則爲其說如實
智慧。若於一切色非色法起顛倒想。以爲清淨。爲說
不淨。皆是無常。勸其令發菩提之心。是爲第二所作
業。

疏二化色天。

菩薩摩訶薩。住兜率天。入三昧。名光明莊嚴身。放光
明徧照三千大千世界。隨衆生心。以種種音而爲說
法。衆生聞已。信心清淨。命終生於兜率天中。勸其令
發菩提之心。是爲第三所作業。

疏三化大千

菩薩摩訶薩在兜率天。以無障礙眼。普見十方兜率天中一切菩薩。彼諸菩薩皆亦見此。互相見已。論說妙法。謂降神母胎。初生出家。往詣道場。具大莊嚴。而復示現往昔已來所行之行。以彼行故。成此大智。所有功德不離本處。而能示現如是等事。是爲第四所作業。

疏四同類共談。

菩薩摩訶薩住兜率天。十方一切兜率天宮諸菩薩衆皆悉來集恭敬圍繞。爾時菩薩摩訶薩欲令彼諸

菩薩皆滿其願。生歡喜故。隨彼菩薩所應住地。所行所斷。所修所證。演說法門。彼諸菩薩聞說法已。皆大歡喜。得未曾有。各還本土。所住宮殿。是爲第五所作業。

疏五爲同類說

菩薩摩訶薩。住兜率天時。欲界主天魔波旬。爲欲壞亂菩薩業故。眷屬圍繞。詣菩薩所。爾時菩薩爲摧伏魔軍故。住金剛道。所攝般若波羅蜜。方便善巧智慧門。以柔輒麤獷二種語。而爲說法。令魔波旬不得其便。魔見菩薩自在威力。皆發阿耨多羅三藐三菩提。

心是爲第六所作業

〔疏〕六善巧降魔。

菩薩摩訶薩住兜率天。知欲界諸天子不樂聞法。爾時菩薩出大音聲徧告之言。今日菩薩當於宮中現希有事。若欲見者宜速往詣。時諸天子聞是語已。無量百千億那由他衆皆來集會。爾時菩薩見諸天衆皆來集已。爲現宮中諸希有事。彼諸天子曾未見聞。旣得見已。皆大歡喜。其心醉沒。又於樂中出聲告言。諸仁者。一切諸行皆悉無常。一切諸行皆悉是苦。一切諸法皆悉無我。涅槃寂滅。又復告言。汝等皆應修

菩薩行。皆當圓滿。一切智智。彼諸天子聞此法音。憂
歎咨嗟。而生厭離。靡不皆發菩提之心。是爲第七所
作業。

〔疏〕七樂音說法。

菩薩摩訶薩。住兜率宮。不捨本處。悉能往詣十方無
量一切佛所。見諸如來。親近禮拜。恭敬聽法。爾時諸
佛欲令菩薩獲得最上灌頂法故。爲說菩薩地名一
切神通。以一念相應慧。具足一切最勝功德。入一切
智智位。是爲第八所作業。

〔疏〕八詣佛聞法。

菩薩摩訶薩住兜率宮。爲欲供養諸如來故。以大神力。興起種種諸供養具。名殊勝可樂。徧法界。虛空界。一切世界。供養諸佛。彼世界中。無量衆生。見此供養。皆發阿耨多羅三藐三菩提心。是爲第九所作業。

〔疏〕九供養多佛。

菩薩摩訶薩住兜率天。出無量無邊如幻如影法門。周徧十方一切世界。示現種種色。種種相。種種形體。種種威儀。種種事業。種種方便。種種譬喻。種種言說。隨衆生心。皆令歡喜。是爲第十所作業。佛子。是爲菩薩摩訶薩住兜率天十種所作業。若諸菩薩成就此

法則能於後下生人間

〔疏〕十多身益生。結益可知。

佛子。菩薩摩訶薩。於兜率天將下生時。現十種事。何等爲十。佛子。菩薩摩訶薩。於兜率天下生之時。從於足下放大光明。名安樂莊嚴。普照三千大千世界。一切惡趣諸難衆生。觸斯光者。莫不皆得離苦安樂。得安樂已。悉知將有奇特大人出興於世。是爲第一所
示現事。

〔疏〕第二時至示沒。名將下生。大乘方便經下卷云。菩薩如其本願。處兜率天宮。能得菩提。轉于法輪。

非爲不能。菩薩思惟閻浮提人。不能至此兜率天上聽受法教。兜率天人。能下閻浮。是故下生。二廣
拔衆苦

佛子。菩薩摩訶薩。於兜率天下生之時。從於眉間白毫相中。放大光明。名曰覺悟。普照三千大千世界。照彼宿世一切同行諸菩薩身。彼諸菩薩蒙光照已。咸知菩薩將欲下生。各各出興無量供具。詣菩薩所。而爲供養。是爲第二所示現事。

〔疏〕二徧警有緣。

佛子。菩薩摩訶薩。於兜率天將下生時。於右掌中放

大光明名清淨境界。悉能嚴淨一切三千大千世界。其中若有已得無漏諸辟支佛。覺斯光者。卽捨壽命。若不覺者。光明力故。徙置他方。餘世界中。一切諸魔。及諸外道。有見衆生。皆亦徙置他方世界。唯除諸佛神力所持。應化衆生。是爲第三所示現事。

疏三嚴利揀非

佛子。菩薩摩訶薩。於兜率天將下生時。從其兩膝放。大光明。名清淨莊嚴。普照一切諸天宮殿。下從護世上。至淨居。靡不周徧。彼諸天等。咸知菩薩於兜率天。將欲下生。俱懷戀慕。悲歎憂惱。各持種種華鬘衣服。

塗香末香。幡蓋妓樂。誦菩薩所恭敬供養。隨逐下生。乃至涅槃。是爲第四所示現事。

〔疏〕四覺諸導從。

佛子。菩薩摩訶薩。在兜率天將下生時。於卍字金剛莊嚴心藏中放大光明。名無能勝幢。普照十方一切世界。金剛力士。時有百億金剛力士。皆悉來集隨逐侍衛。始於下生。乃至涅槃。是爲第五所示現事。

〔疏〕五密召侍衛。

佛子。菩薩摩訶薩。於兜率天將下生時。從其身上一切毛孔放大光明。各分別衆生。普照一切大千世界。

徧觸一切諸菩薩身。復觸一切諸天世人。諸菩薩等咸作是念。我應住此供養如來。教化衆生。是爲第六所示現事。

〔疏〕六先告當機。

佛子。菩薩摩訶薩。於兜率天將下生時。從大摩尼寶藏殿中放大光明。名善住觀察。照此菩薩當生之處。所託王宮。其光照已。諸餘菩薩皆共隨逐下閻浮提。若於其家。若其聚落。若其城邑。而現受生。爲欲教化諸衆生故。是爲第七所示現事。

〔疏〕七令輔翼知。

佛子。菩薩摩訶薩。於兜率天臨下生時。從天宮殿及大樓閣諸莊嚴中。放大光明。名一切宮殿清淨莊嚴。照所生母腹。光明照已。令菩薩母安隱快樂。具足成就一切功德。其母腹中自然有廣大樓閣。大摩尼寶而爲莊嚴。爲欲安處菩薩身故。是爲第八所示現事。

〔疏〕八淨所生處

佛子。菩薩摩訶薩。於兜率天臨下生時。從兩足下放。大光明。名爲善住。若諸天子及諸梵天。其命將終。蒙光照觸。皆得住壽。供養菩薩。從初下生。乃至涅槃。是

爲第九所示現事

〔疏〕九長延天壽。

佛子。菩薩摩訶薩。於兜率天臨下生時。從隨好中放
大光明。名曰月莊嚴。示現菩薩種種諸業。時諸人天。
或見菩薩住兜率天。或見入胎。或見初生。或見出家。
或見成道。或見降魔。或見轉法輪。或見入涅槃。是爲
第十所示現事

〔疏〕十廣現難思。

佛子。菩薩摩訶薩。於身。於座。於宮殿。於樓閣中。放如
是等百萬阿僧祇光明。悉現種種諸菩薩業。現是業

已具足一切功德法故。從兜率天下生人間。

疏結益可知。

建安縣建東桂林坊信女葉氏法名典
恩同男允祚捐貲刊刻
華嚴經離世間品疏論纂要第九十六
卷伏願常膺五福永納百祥入華藏之
門修普賢之行恩有均資同圓種智
康熙庚申年三月
華藏室謹題

大方廣佛華嚴經疏論纂要卷第九十六